

Communicaziun a las medias – SRG SSR Svizra Rumantscha (SRG.R)

RTR, in cumpogn quotidian fidà er en temps burascus

Suenter in'interrupziun da passa in mez onn ha il Cussegl dal public SRG.R (Cdp) puspè pudì far ina seduta e discutir davart las observaziuns fatgas ils ultims sis mais. Il temp da Covid-19 è ina gronda sfida per RTR che pretenda sforzs supplementars. Tenor il Cdp ha RTR dumagnà questa sfida cun gronda premura, cun engaschi nunstanclentaivel e cun auta qualidad.

(srg.r) Cun agid d'in questiunari han ils cussegls dal public da SRG SSR prendì sut la marella la lavur da las unitads d'interpresa en tut las regions linguisticas da la Svizra. Il Cdp SRG. R è s'occupà en detagl cun la lavur dad RTR durant ils mais mars fin fanadur. En spezial ils sforzs da stuair producir ed emetter per part da chasa e betg ord il studio RTR è sta ina provocaziun ch'ha pretendì da tuttas collavuraturas e tuts collavuratur engaschi extraordinari. L'augment dal consum da medias, cunzunt online e televisiun, ha medemamain mussà che RTR ha prestà lavur cumplaina e persistenta. Ina sfida centrala durant quests trais mais è era stada quella da betg stuffientar sur mesira il public cun infurmaziuns davart il virus. Pius Paulin, directur ad interim, e Flavio Bundi, schefredactur, han infurmà il Cdp davart las sfidas che RTR ha stuì – e sto anc adina – surmuntar durant quest temp spezial. Roger Tuor, president Cdp, engrazia a l'entir team da RTR per la gronda e buna lavur.

Marella e Cuntrasts

Tar las perlas dad RTR tutgan franc l'emissiun da radio "Marella" ed ils "Cuntrasts" che vegnan emess en la televisiun. Dal favrer fin l'avrigl ha il Cdp tadlà e guardà tschintg Marellas e tschintg Cuntrasts. Ils cucs visuals ed auditivs, che sveglian l'interess ed activeschan "il kino en il chau" e che fascineschan cun bels maletgs e tuns fins, èn vegnids ludads. Guadench Dazzi, manader da la partiziun Reflexiun, ha dà pled e fatg al Cdp ed era accentuà la flexibladad da collavuraturas e collavuratur durant ils mais passads. In tema omnipreschent en la partiziun reflexiun è era l'egualitad dals genders. I saja da far gronda atenziun da betg tschertgar personas mo en l'agen conturn, punctuescha Dazzi. RTR è en questa dumonda sin la dretga via e vegn era en il futur ad intensivar sias stentas per pudair garantir questa egualitad.

Minisguard

In feedback positiv ha era Mirco Manetsch, manader social/Battaporta/Minisguard, survegni dal Cdp per las tschintg emissions dal Minisguard ch'èn vegnidas emessas da mez favrer fin mez mars. En spezial la moderaziun è vegnida taxada dal Cdp sco buna, simpatica ed adattada per uffants. Fitg legraivel è tenor Manetsch era il dumber d'abunentAs en las raits

socialas da Minisguard e Battaporta che crescha cuntinuadamain. Tuttina è la finamira quella da restar fidaivels a la moda d'emetter analoga, uschia ch'il Minisguard po vinavant vegnir guardà la sonda e dumengia sin l'emettur da televisiun da SRF.

In sguard enavant

En la seduta dal november, l'ultima dal quatrienni 2016-2020, vegn il Cdp da la SRG.R a s'occupar cun las emissions Vita e cretta (radio), ils rapports davart il luf e da las debattas davart la nova lescha da chatscha (sin tut ils vecturs) e dal audio-podcast Café federal da Berna.

Infurmaziuns davart il Cussegl dal public SRG.R

Il Cussegl dal public è in gremi consultativ independent ch'accumpogna la lavur ed il svilup dal program da RTR Radiotelevision Svizra Rumantscha cun constataziuns e propostas. Il Cussegl dal public sa raduna per regla quatter giadas ad onn. El observa singulas purschidas da program, emissions ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87

Sandra Carisch-Killias, secretariat SRG.R, telefon 058 136 31 30, telefonin 078 722 53 73

Cuir, ils 10-09-2020